

1 Pita

Wimaamala

¹ Tau Pita, Yesu Keliso a tu wituwetuwegga.

U nugotuhu geka a gilumiyahi uyahimi, taumi Yaubada a lawa i winaganimi po o ihe wahewa tupo wohepali uyahihii. Naka tupohihi uyahihii o memae, Ponito, Galatiya, Kapadosiya Asiya ma Bitiniya.

² Houga a wawala uyahina Yaubada Amata amaka i nugotuhu nonogogeta po uyahinei i winaganita, yaka Alugo Woiyawa i liyeuyeuta ma Yesu Keliso talanei i oga haleta po ipa ta wiponawogogeya.

Yaubada a lunugotootogo ma a nugodumola uyahimi ina lata.

Witumagana Yesu Keliso binei

³ Yaubada ta wotalagiyeya, tauna ata Guyau Yesu Keliso Amana, tauna a lunugotootogo i lata duma uyahita yaka luyagohana wouna i weleta, po ta guni meta. Ma gwauta i yala houga e nenei binei babana Yesu Keliso hilage uyahinei amaka i towolo meme,

⁴ po ata meyagai hoi yada e noonogogeya, uyahina apegaa buda po apapoe ta wialoni.

⁵ Houga geka uyahina e iloguloguta ata witumagana uyahinei po houga sigasigana uyahina apo luyagohana ta tuhagaya.

⁶ Yaka ta kaoha labatana u nugonugota, ma tamogi houga kuku hotana uyahita apo nugodubu po wiyuwa ta wialonihi.

7 Ludadanahi Yaubada uyahinei ipa ata witumagana a kandidili ina lugeleteya. Tauta galenata mei gole, naka lawa he apuya po ginouli yeuyeu dumana. Naka pitenana ata witumagana gole i gelagoni babana ginouli memewahagana, ma tamogi ludadanahi Yaubada uyahinei po ipa ina liyeuyeuta, po Yesu Keliso a houga gunawilana iyetana uyahina ta huneya po ta wotalagiyeya po ina gelagona duma.

8 Yesu Keliso galenana ega ota galeya ma tamogi omi luhogala uyahina e memae, mei geka hougana ega tata galeya ma ata witumagana po ata kaoha tauna binei ega emoemotata po ta hiyawa pahi.

9 Witumagana uyahinei luyagohana dewadewana u nugonugota ta ialoni.

10-11 Luyagohana geka tu bahapiko odubohi hi bahabaha pikogeya, naka Keliso Alugona u nugonugohi i ibaabani i pa, ‘Keliso wiwuwa apo ina wialoni po u mulina a wasawasa ina tuhagaya.’ Hai baha pikona anona hi nugohiyahiyawehi po hi beiha kandidili hi pa, lawa awai po houga awai apo lawana hina hanapugeya.

12 Yaubada i wogeleteya uyahihhi ipa hai baha pikona ega tauhi ubeihi, ma hapa geka ubeita. Ma Alugo Woiyawa yadei i himila hopuniyai po tauna uyahinei tuwega dewadewana lolowa hi ibaabaniyeya amaka o nonoli. Tu winoyanoya mi yadena ipa geka ginoulihi anohi hina galena tuhagahi.

Mae waiwoiyawana

¹³ Uyahinei, ona nugokadidili dewa dewade-wana binei, ma upumi hina hegoya. Ma ona ingonugotuhu lagona Yesu Keliso a lunugotootogo hougana ina wogeleteya uyahina apo ina welemi.

¹⁴ Yaubada uyahina ona wiponawogo ma ega omi luhogala apapoehi hina tanitaniwagemi, po mei lolowa omi winugoneina hougahi uyahihhi.

¹⁵ Mae waiwoiyawana ona wotagoya babana Yaubada tauna a mae i wiwoiyawa.

¹⁶ Mei Yaubada a Buka uyahina hi bahebaheya hi pa, wiwoiyawa maena ona mimiyeya babana tau woiyawa.

¹⁷ Yohola apo Yaubada a luhetala dumadu-maluna ina geleta uyahita, po ina libahibahita ata bagibagi dewadewahi po apapoehi uyahihiiyei. Yaubadana uyahina o laupali o pa, ‘Amiyai’, yaka anai wiyatayatemi ona matouteya omi luyaghana hougahi uyahihhi babana tauta ta ihewahewa.

¹⁸ Odubona googata hai dewa mei gamogamo po ta wootagohi ma tamogi Yaubada i imiheta. Ega mei gapola yababayaba kina bo toea uyahinei,

¹⁹ ma gapola gegena naka Yesu Keliso talana, tauna mei sipi natuna dewadewana po yeuyeuna googata hi italaguyabehi hai apapoe paligilahi ubeihi.

²⁰ Yaubada Keliso i winagana tahaeya u mulina apoma hipuli atapuna i wiwawali yaka geka houga waimulina Kelisona i wogeleteya tauta ubeita.

²¹ Yaubada Keliso hilagei i witowolo meya po a wasawasa i wogeleteya. Uyahinei Yaubada ta

witumaganeya. Yaka Keliso uyahinei Yaubada ta nugonugotuhu lagoneya anai witumaganata.

Guni meme

²² Tahaya dumadumaluna amaka ta wotago imahiyeya po uyahinei nugonugota hina yeuyeu po wiwalehina dumadumaluna Yaubada i weleta, yaka ona lauhogala lawa emosi po emosi uyahihii nugonugomi atapuhiyei.

²³ Tauta guni memeta ega amamata uyahihiyei ita nei, ma guni memeta naka Amata a baha lauyagohanana po memewahagana uyahinei i nei yaka apo ata luyagohana ina mewahaga.

²⁴ Mei Yaubada a Buka i bahebaheya i pa,
 ‘Lawa ataputa galenata mei hiyamoni,
 yaka ata didiga mei hiyamoni belahi.
 Matababana hiyamoni houga kuku hotana ma
 apo ina hilage,
 ma a bela apo ina kokodila po ina peu.

²⁵ Ma Yaubada a baha apega ina buda.’
 Tauna bahana houga magomagouna ta noonoli tuwega dewadewana uyahinei.

2

¹ Amaka tauta ta guni meta yaka ipa ata apapoe magomagouhi ata dewa koyakoyama, ata wiwale-walegama, ata omgenagenalili, ata wialutu magomagouhi ta wihinigigiyei.

² Guni memeta ipa mei logaloga meyameyata uyahinei ata luhogala baneina Yaubada a baha dumadumaluna binei mei logaloga gugu he lauhogaleya pite. Naka uyahinei apo luyagohana ta tuhagaya.

3 Babana Guyau a nugodewadewa amaka ta tuhagaya.

Yaubada a numa e wogowogoya

4 Yaubada a numa lawa uyahitiyei e wogowogoya ma a ogola banei dumana naka Yesu Keliso, tamogi ogolana lawa hi wihinigigiyea. Uyahinei tauta ta nae uyahina

5 po ta wimodale a numa binei. Ma numana u hinena tauta tu witalaguyaba waiwoiyawata po ata ombenena yeuyeuna ta weleweleya Yesu Keliso gowanei, naka Yaubada ta laikaohaya.

6 Mei a Buka uyahina i bahebaheya pite i pa,
‘Ona galeya ogola dewadewana a winagani
 po a houna tahaeya numa wogona binei Saiy-
 oni dobuna uyahina.

Apo iyai ina witumaganeya yaka apegia ina
 wihinimaya.’

7 Yaka tauta iyawoi Yesu Keliso ta itumaganeya naka ogolana i dewadewa duma, ma iyawoi tauhi ega hita itumaganeya naka ogolana ega hita luhogaleya. Ma Buka i baheya i pa,
‘Tu lunuma ogolana hi ihinigigiyea

 Yaubada amaka i buiya po ogola
 magomagouhi i haki lagonihi.’

8 Ma gasi i bahena meya i pa,
‘Yohola apo ogola geka uyahina lawa aehi hina
 labatehi po hina peu.’

Hina labatena mehi po hina pipeu, matababana Yaubada a baha ega hita wiponawogogeya naka Yaubada a nugotuhu.

Tauta Yaubada a lawa

9 Tamogi tauta Yaubada a guguni wainaganita po tauta Wasawasa a tu witalaguyaba ma a bolu baneina waiwoiyawata. Tauna tupo uguwa uyahinei i otugeta po yayata uyahina i hounita ipa omhunana ta wohepaya.

10 Lolowa tauta ega guguni emosi ma geka hougana amaka tauta Yaubada a guguni. Lolowa Yaubada a lunugotootogo ega tata wialoni, ma geka hougana amaka ta tuhagaya.

Ata lugagayo tu meuputa u matahi

11 U lawa, tauta hoi hipuli ta ihewahewa uyahinei a laihunami, ipa omi luhogala apapoehi u nugenugomi he memae ona wihinigigiye, babana omi luyagohana Yaubada uyahinei he igawiyehi.

12 Ma omi mae ona woimahi tu meuputa u matahi, ma inapa hina iapapoemini naka ega genona babana Yaubada a houga gunawilana uyahina omi bagibagi dewadewahi hina wogeletemi po tu meuputa lawahi Yaubada hina huneya.

13 Tauta amaka ta palihalena meta Guyau uyahina yaka gabemani hai taniwaga uyahina ta wiponawogo, po gabemani taniwaga baneina hipuli geka uyahina.

14 Gabemani ta wiyatayatehi babana Taniwaga Baneina tauna hai bagibagi i welehi po tu apapoe hina taniwaga kadidili uyahihi, ma tu dewadu-malu hina kawaidewedewehehi.

15 Yaubada a nugotuhu geka pitenana i pa, apo lugagayo atapuhi ta wiponawogogehi po uyahinei

ma tu winugoneina hai ompalidibodiboga ina yababa.

¹⁶ Tauta amaka Yaubada i palihaleta, ma tamogi ega ipa dewa apapoehi uyahihi ta nenaе ma ipa Yaubada a tu bagibagi dewadewata.

¹⁷ Lawa atapuhi tana iyateyatehi. Tu witumagana lawahi ta lauhogalehi. Yaubada ta matumatureya. Gabemani taniwagana tana iyateyateya.

Tu bagibagi a ututu

¹⁸ Taumi tu bagibagi hota omi babada anai wiyatayatemi ona iponawogogehi ega ipa lawa a dewa wodewadewana tunawana ma lawa a dewa woapapoena gasi.

¹⁹ Apo ega omi apapoe ma Yaubada a nugotuhu binei hina lainugodubu yababami yaka naka i haki wahaga, ma on'omtaibagibagi Yaubada u matana.

²⁰ Apo omi dewa apapoehi ubeihi ma hina kodikodilimi ma on'omtaibagibagi naka ega ita haki. Ma inapa omi mae dewadewahi ubeihi ma hina kodikodilimi ma on'omtaibagibagi naka Yaubada u matana i haki duma.

Keliso ubeita i wiyuwa

²¹ Yaubada amaka i otugeta wiyuwa tahayana uyahina babana Keliso ubeita i wiyuwa po ani galena i houni uyahita yaka ipa tauta ta witutupoganeya.

²² 'Ega kikina a apapoe gehouna
po ega ita ikoyakoyama.'

23 Hi widibogi ma ega hai baha ita wimiheya, wiyuwa hi weleya ma ega ita luuyogigai ma tamogi i witumagana kadidili Yaubada uyahina babana tauna taniwaga dumadumaluna.

24 Keliso hinina i wiyuwa tauta ubeita po hi witakeya po a wiyuwana uyahinei ata apapoe witeina i awalihi, yaka ipa mae dumadumaluna binei ta nenea po ta hilage babana ata dewa odubohi uyahihiyei amaka ta hilage.

25 Ma lolowa tauta mei gamogamo weluwelupowata ma amaka ta gunawilena meta Tu galena iteteta uyahina babana alugota hai taniwaga tauna.

3

Tutu tawine ata numahine lugagayohi

1-2 Wiwine tawitawinem i agagomi ona wiyateyatehi. Ma tauhi Yaubada a baha ega hita itumaganeya ona wiyateyatehi. Ega ona wobahabaha ma omi mae hina yeuyeu po uyahinei hina galena tuhaga ma hina witumagana.

3 Ega ipa hinimi yawa ona ihiyeya po apalami ona beipi imahiyeya, ma ega wihiya belana dewadewana uyahinei ona ihiyena memi ma ega kaleko dewadewana ona luiluiya.

4 Tamogi ipa wihiya memewahagana uyahinei nugonugomi ona wihiyehi naka nugohegoya ma nugoyato uyahihiyeli, tauhi mae dewadewa dumahi Yaubada u matana,

5 po mei odubona wiwine waiwoiyawahi hai winugonugotuhu lagona Yaubada uyahina ma dewahi hi mimiyeхи po agagohi hi iyateyatehi.

6 Mei Sela agona Abelaham uyahina i wiponawogo ma i kawaibadeya. Ma inapa taumi omi dewa mei Sela po ega awai gehouna ona matuteya yaka googana taumi.

7 Taumi tutu tawine ololotomi, wiwine o lawag-
hi po mitehi o memae, ipa ona winugonugotuhu
imahi po ona wiyateyatehi meka po apo Yaubada
omi lupali anona apegga ina welemi. Babana tauhi
ega hita kadidili duma, tamogi tauhi po taumi omi
luyagohana emosi houga e nenei uyahina.

Wiyuwa ta ialoni

8 Geka u baha anani kokoe uyahimi ma emosi
po emosi ona winugoemota. Omi lawa hai pilipili
ona genogehi. Walewalehimi ona lauhogalehi.
Lunugotootogo po nugohopuhopu dewahi uyahihiei
ona mae.

9 Apo uyahimi dewa apapoena hina dewaya
yaka ega ona laubigo, apo hina paliapapoenimi
yaka hai baha ega uyogigaigei ona imiheya, ma
nugohegoyagei hai baha ona wimiheya. Babana
tauta Yaubada amaka i winaganita ipa tauta nu-
gohegoyagei tana ibaabani, yaka apo Yaubada ina
kawaiidewedeweta.

10 Geka pitenana Yaubada a baha i baheya i pa,
'Apo iyai luyagohana ina luhogaleya
 po houga dewadewana ina wialoni
 yaka houga magomagouna a baha wihapona
 po a wikoyakoyama ina wohounihi.

11 Gasi a dewa apapoehi ina wihinigigiye
 ma lawa uyahihia a dewa hina dewadewa,
 po a luhogala baneina winugoemota.

12 Matababana ata Guyau houga magomagouna
tu dewadumalu i luhogalehi
po hai lupali i nonola imahiyeya
ma tu apapoe i mepuputehi.'

13 Apo mae dewadewana ta luhogaleya, yaka
apega iyai gehouna ina wigawiyeta.

14 Apo dewa dewadewa ta mimiyeya ma lawa
hina ihiniwiuwata ega ta genogeno po gasi
ega ta matomatouta, babana Yaubada apo ina
kawaiidewedeweta.

15 Yaka nuponugomiyei Keliso uyahina ona pa,
'I Guyau waiwoiyawana.' Apo lawa awai ina
lubayademi ina pa, 'Matababana awai ma Keliso
o itumaganeya?' Yaka a nonogomi lawana a
lubayadana ona imiheya,

16 anai wiyatayatemi po anai nugohegoyami.
Tauta Keliso tu wotagona uyahinei dewa dewade-
wahi ta wootagohi. Ma inapa hina palipaliguyo-
guyogeta, yaka apo hai baha hina wihinimaehi
ata dewa dewadewahi ubeihi.

17 Dowa apapoena binei wiyuwa ta ialoni naka
ega ita dewadewa. Ma dewa dumadumaluna
binei ma wiyuwa ta tutuhagaya naka Yaubada a
nugotuhu.

18 Naka pitenana Keliso lawa dumadumaluna
ma tauta tu apapoe ubeita mala emosi i hilage ipa
ina weluwinita Yaubada uyahina. Hinina hi lihi-
lageni ma alugona uyahinei i luyagohana meme.

19 Naka hougana i hopu hiyoyowa tu miyena
uyahihi i guguya.

20 Ma lawahi uyahih i guuguya naka, tauhi
odubona Nowa hougana wam i ginoginouli
uyahina Yaubada hai wiponahahalena binei

i'mtaibagibagi. Ma tamogi goila hopu uyahina hi halele pahihi ma magouhi 8 tunawahi hi luyagohana wam uyahina.

²¹ Goila geka bapatiso wekiwekilalana, apo uyahinei ta togo yaka ta luyagohana. Bapatiso goilana ega hini yeuyeuna binei ma nugoyeuyeu Yaubada u matana binei, Yesu Keliso a towolo meme uyahinei.

²² Tauna amaka i gae hoi yada po geka hougana Yaubada u awala hinebawana e memae ma tu winoyanoya po tu taniwaga po tu manini e tani-taniwagehi.

4

Ata dewa ta buinihi

¹ Keliso tauna i wilawa hota po hiniwiwuwa i tuhagaya yaka taumi wiwuwa u hinena ona towolo kadidili po mei Yesu. Babana wiwuwa ta ialoni ata apapoe amaka ta wihinigigiyeji.

² Uyahinei tauta hoi hipuli ta memae ata houga atapuna ta palihaleya Yaubada uyahina po ina taniwaga ma ega ata luhogala apapoehi hina tan-taniwageta.

³ Odubona uguwa dewahi ta dewedeweji yaka galenata mei tu meuputa, ma geka hougana ta wihinigigiyeji. Naka dewa buubuuwa, luhogala apapoehi, uma buubuuwa, matamaga, palouma po balau witumaganahi.

⁴ Ata lawa hoi uputa ata nugobui ega hita galena tuhagaya yaka hi kawaiapapoenita, babana dewa buubuuwa ega tata wootagoya.

5 Tamogi Yaubada a luhetala iyetana uyahina apo ina luhetalehi, lawa lauyagohanahi po hilahi-lagehi atapuhi.

6 Geka binei ma Yesu i hopu tu hilahilage uyahihpo tuwega dewadewana i guguyeya babana hinihi libahibahi amaka i wialoni ma alugohi ipa apo luyagohana hina tuhagaya Yaubada uyahina.

Tu witumagana ta luhogalehi

7 Ginouli atapuhi hai houga kokoe amaka e gelegeleta, yaka nugonugomi hina lugigilihi ma upumi hina hegoya ipa ona laupali.

8 Ma ginouli baneina ipa emosi po emosi ona lauhogalena memi, babana luhogala emoemotana apapoe magomagouna ina nugotataya.

9 Ma omi numa guduhi ona hoenihi po lawa ona haguahuhi ma ega ona lauhinidoodola.

10 Yaubada guta tapuna po tapuna amaka i weleta, ma gutahi ta wibagibagihpo uyahihiyei lawa ta haguhi yaka tauta Yaubada launugootogona a tu bagibagi dewadewata.

11 Tauyai tu luguguya Yaubada a baha dumana to lauguguyeya. Ma taumi tu wihtaguhagu omi kadidili Yaubada i welewelemei uyahinei ona ihaguhagu. Yaka apo ata bagibagi atapuhi lawa hina hanapugeya po Yaubada hina wotalagiyeya Yesu Keliso gowanei. Matababana tauna Wasawasa po Kadidili memewahagana. Moina.

Yesu a bolu wiyuwa tu wialonina

12 U lawa, ega nugonugomi hina gohogoholihi wiyuwa baneina o ialonihi ubeihi. Naka wiywahi ega ginouli wouhi.

13 Ma Keliso wiyuwa geka pitenana i tuhagaya, inapa tauna binei ma wiyuwa ona wialoni yaka ona kaoha duma, babana ona wiwasawasa gogona.

14 Inapa lawa hina paliguyogougemi, babana taumi Keliso tu wotagona yaka ona kaoha duma, ma ipa ona hanapugeya Yaubada Alugona Waiwasasana e memae uyahimi.

15 Taumi ega ita linanami ipa dewa apapoehi ubeihi hiniwiyuwa ona wialonihi yaka omunugo, danene, geno yababa, po dewa apapoehi gehouhi ona wihinigigiyeji.

16 Ma dewa emosi hota i lainanami naka taumi Keliso a bolu yaka gowana binei ma apo hiniwiyuwa ona ialonihi, ega ona ihinimaya tamogi Yaubada ona wotalagiyeja.

17 Houga amaka i geleta po Yaubada a luhetala ina wiwawali a guguni uyahita. Ma u mulina Yaubada a tuwega dewadewana tu wiponahahalenahi apo libahibahi banei dumana hina wialoni Yaubada uyahinei.

18 Mei Yaubada a Buka i bahebaheya i pa,
‘Tu dewadewa kikina ma apo libahibahi hina
wialoni
tamogi tu apapoe witai banei dumana apo
hina wialoni.’

19 Tauta iyawoi Yaubada a nugotuhu binei ma wiyuwa ta ialoni, ta palihalena meta uyahina po ina galena iteteta, babana tauna tu wiwawalita po a paliwitumagana hi dumalu, yaka a dewa

dewadewahi ega ta wohounihi.

5

Tanitaniwaga hai ututu

¹ Taumi tanitaniwaga geka a palipaliwelemi omi bagibagi binei, babana tau taniwaga gehouna. Keliso wiwuwa i ialoni tau tu limoinena gehouna, po apo a wasawasa ina wogeleteya u guta apo ina weleu.

² Babada, omi bolu ona galena itete imahiyehi babana tauhi Yaubada a lawa i welemi ipa ona taniwagena imahiyehi. Ona gagalena itete Yaubada a luhogala binei ma ega omi wigapola binei, ipa ona wileta po lawa ona haguhi.

³ Ega ipa ona ibadabada lawa uyahihia ma ani galena dewadewana ona wiatatiyehi omi mae uyahihiyiei.

⁴ Ma houga u matata Tu galena itete baneina apo ina nei po unuhau wasawasana ona waya po ina mewahaga.

⁵ Taumi ololoto woumi tanitaniwaga ona wiyatateyatehi po atapumi ona nugohopuhopu gogona, ma emosi po emosi ona iyateyatena memi. Mei Yaubada a Buka i bahebaheya i pa,
‘Tu nugogegae Yaubada i wigawiyehi,

ma tu nugohopuhopu i lunugotootogogehi.’

⁶ Uyahinei ona nugohopuhopu ma ona palihalena memi Yaubada Manimaninina u nimana po houga dumanei apo ina houna geletemi.

⁷ Omi nugogeno atapuhi Yaubada ona weleya babana apo ina galena itetemi.

Ata wiwuwa ma ata hagu

⁸ Upumi hina hegoya ma omi gawiya Tomodulele ona gagalena imahiyeya, babana tauna mei laiyoni e wiiwila nae ma a Yam lawa e bibeihā.

⁹ Tauna ona lutomgeya po ona towolo kadidili omi witumagana uyahinei, babana ta hanapugeya tu witumagana tupo wohepalī uyahina wiyuwa baneina he tutuhagahi Tomodulele uyahinei.

¹⁰ Omi wiyuwa houga kukuna ona wialoni ma u mulina Yaubada apo ina woimahiyemi po ina wikadidilimi po ona towolo momota. Babana Yaubada Tu lunugotootogo, yaka i otugeta po ipa a wasawasa memewahagana uyahina ta mae Keliso mitehi.

¹¹ Tauna Wasawasa po Kadidili memewahagana. Moina.

Baha wimaamala

¹² Omi leta habuluna walehita dumadumaluna Sailasi i haguwe po a gilumiyahi uyahimi, Yaubada lunugotootogo moinanei a paliwelemi po a wikadidilimi.

¹³ Ma tu tapalolo Babiloni u tuponana tu mae tauhi mei taumi Yaubada i inaganimi, hai wimaa-mala taumi uyahimi. Ma natuwe Maki a wimaa-mala uyahimi.

¹⁴ Emosi po emosi ona lauhogalena memi po omi luhogalana winiuyagonagei ina lugleteya.

Yaubada a nugodumola taumi Keliso tu wotagona ina melabenimi.

**YAUBADA A WOGATALA WOUNA
The New Testament in the Tawala language of Papua
New Guinea**

Nupela Testamen long tokples Tawala long Niugini

copyright © 1985, 2014 Wycliffe Bible Translators, Inc. and Bible Society of Papua New Guinea

Language: Tawala

Translation by: Wycliffe Bible Translators

Text © 1985, 2014 Wycliffe Bible Translators, Inc.; 2014 print edition © Bible Society of Papua New Guinea

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-06-24

PDF generated using Haiola and XeLaTeX on 28 Dec 2024 from source files
dated 31 Aug 2023

03dd8e7f-64f4-5464-abd5-5e08202f0f29